

Case  
F 39.326  
1622 psa

BOX



LE  
PSAVLTIER  
DES REBELLES  
DE CE TEMPS.

---

M. DC. XXII.

Case

F

39

1326

1622 p5a

THE NEWSPRY  
LIBRARY

LE  
PSAVLTIER  
DES REBELLES  
DE CE TEMPS.

*Nisi Dominus edificauerit domum, in  
vanum laborauerunt qui edificant eam.*  
Psalm. 126.

**R**OCHELOIS, la source & l'origine des Rebelles, le cahos & la confusion de la desobeyssance & de l'ingratitude, peuples bouffis d'orgueil & d'arrogance, vrayes auortons de la nature qui comme Monstres des-naturez, à l'imitation de la superbe des Geans; voulez entasser le mont Pelion, sur le mont Ossa; neredoutant rien moins que la iuste colere des Cieux & des hommes, j'à preparez pour estre les legitimes punisseurs de l'enormité de vos crimes, n'ayez plus les cœurs endurcis comme des Pharaons, il y va du vostre à ce coup, l'alarme sonne

partout la France, tous les peuples sont esmeus contre vos impietez, toutes les Republicques Estrangeres l'orgnent & regardent de trauers vos Rebellions, bref iusques icy le Roy n'a desiré de vous monstres son iuste courroux, ayment mieux vostre conuersion que vostre perte: mais à present son interest l'engage de telle sorte à vous faire voir le visage d'un repentir, qu'il est à vous d'y songer de bonne heure, & de preuenir l'execution de sa iustice.

Et vous pestes infames du Royaume, habitans de Montauban, qui sur le moule reprouué d'un infidelle Nabuchodonosor, croyez fabriquer vne Ligue perdurable, pour vsurper, & vous rendre maistres d'un heritage, qui ne vous est baillé ny par Amphiteose, ny seulement à simple tiltre de Loyer, que croyez vous, qu'esperez vous par vos indignes procedures, estimez vous y tenir bon contre le seruice du Roy, tant que le Soleil aura pouuoir d'esclairer aux hommes, estimez vous que ce Diuin Flambeau vueille desormais illuminer vostre contrée, sans vous faire voir que vos actions meritent la censure des



gens de bien; non non, foibles cerueaux; pire qu'enchantez, iamais les œuures n'acquestent aucun prix de gloire & de merite, si les projectz ne sont limitez sur des regles toutes equitables, & non contraires aux saintes Loix de la iustice; & combien que vos reuoltes soyent appuyées sous des pretextes ( ce dictes vous ) de Religion, si est-ce neantmoins y allant de l'obeyssance & du respect que l'on doit à son Prince, en qualité sujets, l'on doit mettre bas toute sorte de considerations, & s'asseurer tant en sa foy, que par vn concordat de bienveillance & d'affection, toute rancune se dissipe, & toute Rebellion deuienne à neant; Car aussi bien la Rebellion n'est autre chose qu'une Apostheme grosse & enflée en apparence, qui venant à creuer ne produit iamais d'autres effets ny plus valables que le Ballon, dont l'on s'exerce aucunes fois, parmy l'inconstance des actions humaines: & puis les Roys sont tousiours Roys, & comme Lieutenants de Dieu sur terre, viennent tousiours à bout de leurs entreprises, ayans les Anges pour Conseil, pour cohorte secrette, les troupes du Ciel, pour assistance visible, la fleur &

l'eslite des plus braues Martiaux, qui ne craignent & ne redoutent ny la fureur deselperée des infidelles, ny leurs plus subtiles & guerrieres inuentions, ny n'aprehendent iamais de forcer leur bastions & leurs forteresses, quoy qu'il semble que ce soit vn impossible.

Ainsi Dieu protege les siens, & leur donne l'ayde & le confort tel que la necessité le requiert, en toutes sortes d'occasions, n'ayant rien tant en horreur entre tous les vices, que la fragilite humaine peut perpetrer, que l'Orgueil & la des-obeyssance, vraye racine produicte de toute autre infirmité, & de fait quand il est question de voir les tesmoignages plus constans de la Iustice Diuine, c'est sur ce point principalement, ayant commencé les premiers effects, en la personne des Anges, puis en celles des hommes, comme à l'endroit de *Céré*, *Dathan* & *Abiron*, qui s'estoyent audacieux rebellez contre leur Prince, & puis sur les Villes & Citez, comme il a fait du temps de la primitiue Eglise, sur la grande & renommée *Hierusalem*; cela estant, comme il est veritable, quel Demon possede vos ames peuples mutinez,



quel espoir detient vos esprits, de n'en-  
 courir le iuste chastiment de nostre  
**LOVIS LE IUSTE**, sur quoy vous pou-  
 uez vous asseurer desormais, apres auoir  
 commis tant d'iniquitez en despit de Dieu  
 & du Roy; quand au zele que vous dictes  
 auoir en la Religion, c'est vn abus, pour  
 les intelligences que vous pouuez auoir  
 parmy quelques mauuais François, ce  
 n'est que vent, de dire aussi que vos murs  
 & vos terrasses feront la nicque au Canon,  
 c'est passer les bornes de l'arrogance: car  
 quand vous auriez employé tous vos  
 moyens & toutes vos vies à bastir & ren-  
 forcer vos places, qu'induement vous  
 possédez, vains seroyent vos labeurs, &  
 inutiles vos peines, & comme dit le Royal  
 Prophete Dauid en son Pleaume cent  
 vingt-sixiesme; *Nisi Dominus edificauerit  
 domum, in vanum laborauerunt qui edificant  
 eam*; Or est il qu'estant reprouuez comme  
 vous estes, vous auez beau bastir & forti-  
 fier, le Seigneur & le Dieu des armées n'e-  
 stant point pour vous, c'est en vain que  
 vous embellissez vostre demeure, & que  
 vous la voulez asseurer par des inuentions  
 toutes guerrieres, & principalement mal-

gré les Loix establies de la part de Dieu, par lesquelles les peuples sont estroictement obligez de recognoistre leur Roy, & de luy porter obeyllance.

Infidelles vous sçavez ce qui en est, il se trouue parmy vous assez de riches esprits qui n'ignorent de rien, que des effects de leur deuoir, les Escritures vous sont assez communes, ( toutes-fois elles peuuent estre mal-interpretées ) quoy que ce soit, vous auez des exemples très-pregnans pour vous instruire à l'obeyllance, & vous ranger sous l'honorable joug de la fidelité, suyuant lesquels ou redoutant de pareilles aduentures, vn bon ordre s'introduira parmy vous à la conseruation de vos familles; & comme vn Achab despoüillé de ses plus orgueilleuses passions, vous conquesterez la Palme de la grace, laquelle avec le temps pullulera à vos aduantages, de telle sorte que vous n'aurez iamais soing de veiller pour la conseruation de vostre Cité, ainsi que vous faictes, cessant quoy vos plus grandes prosperitez seront changées en malheurs & desolations, vos plus grandes ioyes en pleurs & tristesses, & toutes vos  
veilles

veilles en assoupissemens procurez par des  
Morphées de l'Enfer, par ce que *Nisi Do-*  
*minus custodierit ciuitatem, frustra vigilat qui*  
*custodit eam.* Job, m. l. x. v. 11.

Vous me direz que ce sont deux poinçts  
tres-constâts & tres-fermes pour la guer-  
re, que d'estre forts & vigilans, ainsi que  
vous estes, & d'autre part ne soustenant  
les efforts que l'on vous fait, qu'en inten-  
tion de conseruer iusques à la mort vostre  
Religion, qu'il y a de l'apparance que vous  
viendrez a bout de vos affaires : Ce qui  
seroit grandement considerable à la ve-  
rité, si en la guerre presente, il s'agissoit de  
Religion, & que le Roy fut infidelle, mais  
ny allant que de l'obeyssance & du deuoir,  
c'est à ce coup que vous deuez vous sous-  
mettre pour vostre profit, & luy rendre  
les villes que temerairement vous luy  
auez refusees, comme si c'estoit vn Estran-  
ger, qui voulut enuahir vn heritage qui  
ne fut pas de ses appartenances : C'est  
pourquoy tous vos constructions & vos  
forteresses, toutes vos rebellions, & vos  
veilles continuelles ne sont rien, & ne  
seront rien desormais à l'endroit du Roy,  
puis que sa cause est toute iuste, & qu'il



ne combat que sous la conduicte de la  
raison.

Donc engeance opiniastre ouurez luy  
les portes d'affection, donnez luy vostre  
cœur, & tesmoignez luy tant zele pour  
son seruice, que sa Majesté ait sujet de  
vous protéger & vous cherir, & qu'au  
lieu de vous tenir en de perpetuelles in-  
quietudes, vous obteniez par sa miséricor-  
de vn repos du tout perdurable, exempt  
de trouble & d'aduersitez, aussi bien tout  
ce que vous faictes n'est que vanité, &  
comme dit nostre Royal Prophete, en des  
actes si remplis d'impietez: *Vanum est vo-  
bis ante lucem surgere, surgite postquam sede-  
ritis qui manducatis panem doloris.*

Vous y estes habitans de Montauban,  
vos opiniastretez vous font manger le  
pain de la douleur, & si pour cela vostre  
repos n'est préparé: Aussi qu'elle appa-  
rence y autoit il, qu'un Roy tout Iuste,  
offencé par des infidelles, à qui le pardon  
des premieres fautes estoit promis, n'eust  
la raison de telle effronterie, tousiours,  
tousiours resister contre son Roy, & luy  
desnier ce que le droit & la nature luy  
ont acquis, est-ce pour l'inciter à la mise-

ricorde, non, non Rebelles, vous mangerez le pain de la douleur, & serez dans des veilles continuelles, agitez des tourmentes de la guerre, & environnez d'un comble de malheurs, & pour le couronnement de vos demerites, à l'exemple des habitans de Mon-heur, vostre sang rougira les Fleuves, afin qu'il en reste des marques insignes à la posterité, vous assurent outre plus, *Cum dederit dilectis suis somnum ecce hereditas Domini, filij merces fructus ventris.*

Pensez sur cecy ce que vous voudrez: car le Roy sera si bien seruy désormais, qu'il ne sera plus besoin de tirer cinquante mille coups de Canon pour faire breche à vos murs & à vostre audace, i'estime à ce coup que vous n'aurez loisir de vous promener avec vos femmes ainsi que vous faisiez l'an passé, tandis que les Soldats faisoient ce qu'ils pouuoient pour le service du Roy, il y a bien du charbon de rabais, personne ne pretend plus de faire vne Duché de Montauban, au contraire chacun y court pour vous esgorger, ou pour vous conuertir, d'autant que l'argent du Roy est mieux gouverné qu'il n'estoit pas, bref à



presët personne ne cōpagnonne avec luy, sa seule volôté & son interest luy font endosser le harnois, & la iustice de sa cause, sert d'emulation aux plus timides, pour l'armer de courage, & de magnanimité: Tellemēt; ainsi que les dards vangeurs des offences des peuples obstinez, seront en la main de nostre puissant Monarque, LOUIS XIII. ainsi l'affliction surmontera la rage des enfans des Rebelles: Ce qui nous est tres-assuré par le mystere de ces paroles; *Sicut sagitta in manu potentis, ita filij excussorum.* p. 33 v. 33. in. 3. 3. 3. 3.

Hé donc quel bon heur sera ce à ceux, qui comme Isaac auront presté le col de l'obeyssance, de combien de foelicitéz & de benedictions seront ils remplis, puis que la vengeance sera exercée sur les Rebelles, & que les superbes seront delmis de leur siege d'arrogance, alors *Beatus vir qui impleuit desiderium suum ex ipsis, non confundetur cum loquetur inimicis suis in porta.* p. 33 v. 33. in. 3. 3. 3. 3.

Donc Rochellois, & vous habitans de Montauban, qui sous prétexte de Religion, croyez beaucoup meriter tournant la pointe de vos armes contre celles du Roy, d'emasquez vos actions, & reuestez

vous d'une robbe d'innocence : car la bea-  
 titude & fœlicité d'un peuple, consiste af-  
 ſeurement en l'accompliſſement des de-  
 ſirs de ſon Prince ; notamment lors que  
 ſes deſſeins ont pour borne l'équité, ainſi  
 que noſtre brave Monarque, qui ne dege-  
 nère en rien à ſon eſſence, ny à ce que la  
 nature là voulu gratifier en naiſſant, il  
 n'eſt point voſtre ennemy, ains voſtre le-  
 gitime Proteſteur, ce n'eſt point un Bar-  
 bare, quoy qu'il vous face la guerre, mais  
 c'eſt voſtre vray pere debonnaire, qui  
 parmy les chaſtimens & les afflictions de  
 la Milice, taſche de vous faire recognoi-  
 ſtre l'enormité de vos offences. Donc che-  
 riſſez lé, portez luy l'honneur, le reſpect,  
 & l'obeyſſance telle que vous luy devez :  
 quoy faiſant une concorde perdurable,  
 regnera parmy vos familles & vos biens, &  
 la gloire de ſi loüables actions eſtant reco-  
 gneues, proceder de la part des trois per-  
 ſonnes Diuines, voſtre Prouince demeu-  
 rera en ſa premiere ſplendeur, & dans  
 l'ordre premier de ſes libertez, pendant ce  
 temps, & iuſqu'à la conſommation des  
 ſiecles.

F I N.

*[The page contains faint, illegible text, likely bleed-through from the reverse side.]*



